

PULIHAN SA MALANGKOBON-SA-TANAN, MASANGKARONG CRISTO ANG KULTURA ALANG SA USANG BAG-ONG TAWO

Mensahe 6

Ang Unibersohanong Kasaysayan segun sa Pamatigayon sa Dios— ang Diosnong Kasaysayan sulod sa Tawhanong Kasaysayan nga Motuman sa Tinguha sa Kasingkasing sa Ginoo nga Mabatonan ang Usang Bag-ong Tawo sa Realidad

Basahong Kasulatan: Joel 1:4; 3:11; Efe. 1:3-6; 2:15; 4:22-24; Miq. 5:2; Bug. 19:7-9

- I. Dunay duha ka kasaysayan dinhi sa uniberso: ang kasaysayan sa tawo, ang tawhanong kasaysayan, ug ang kasaysayan sa Dios, ang diosnong kasaysayan; samag dayag nga kabhang ang una, ug sama sa unod sulod sa kabhang ang ulahi—itandi sa Joel 1:4:**
 - A. Detalye sab kaayong gipadayag sa Biblia ang diosnong kasaysayan sulod sa tawhanong kasaysayan; kasaysayan nato ang kasaysayan sa Dios kay nausa man Siya nato:
 1. Makita gyod unta nato ang kasaysayan sa Dios sa nilabayng eternidad isip pagpangandam alang sa lihok Niya nga mausa sa tawo:
 - a. Nagsugod sa walay kataposang Dios ug sa Iyang pamatigayon ang diosnong kasaysayan; segun sa pamatigayon sa Dios, gusto Niyang iumol ang Iyang Kaugalingon sa tawo aron mausa sa tawo, mahimong kinabuhi, sangkap sa kinabuhi, ug tanan sa tawo, ug aron mabatonan ang tawo isip pagpadayag Niya—Efe. 3:9-10; 1:10; Gen. 1:26; 2:9.
 - b. Nagsabotsabot ang Dios sa Diosnong Trinidad Niya sa eternidad nga mohukom kalabot sa mahinungdanong kamatayon ni Cristo nga magtuman sa walay kataposang pamatigayon sa Dios—Buh. 2:23.
 - c. Nangandam ang ikaduha sa Diosnong Trinidad aron magtuman sa “mga paggula” Niya gikan sa eternidad nganha sa panahon ug ipanganak sa Bethlehem ingon nga tawo—Miq. 5:2.
 - d. Gipanalangin sa Dios ang mga magtutuo diha ni Cristo sa espirituhanong mga panalangin sa kalangitan sa wala pa matukod ang kalibotan—Efe. 1:3-6.
 2. Nagsugod sa pagpakatawo ang kasaysayan sa Dios diha sa tawo ug nipa-dayon sa Iyang mga kahikayan sa pagkinabuhi ingog tawo, pagkalansang sa krus, pagkabanhaw, ug pagkayab; niingon ang Oseas 11:4 nga kini ang mga lubid sa tawo, ang mga bugkos sa gugma:
 - a. Ang diosnong kasaysayan, ang lihok sa Dios diha sa tawo, naa sa nahikay nga Cristo, sa Dios-tawo, isip sumbanan, ngadto sa bag-ong tawo nga mahingpit sa Bag-ong Jerusalem, ang dakong Dios-tawo, ang kinataposang katumanan sa walay kataposang pamatigayon sa Dios.
 - b. Pinaagi sa pagpakatawo ug pagkinabuhi ni Cristo ingog tawo, gidala Niya ang Dios nga walay kinutoban nganha sa tawong may kinutoban, giusa ug gisagol Niya ang Tulo-usang Dios sa tawong may tulo ka bahin, ug gipadayag Niya diha sa pagka-tawo Niya ang madagayaong Dios sa datong mga kaayo Niya pinaagi sa mahumot nga maayong kagawian Niya.

- c. Mapulihong kamatayon, malangkobon-sa-tanan nga kamatayon, malangkobon-sa-tanan nga balaodnong katubsanan ang pagkalansang ni Cristo sa krus, nga nagtapos sa daang kabuhatan ug nagsulbad sa tanang problema (Juan 1:29); sa pakalansang Niya sa krus gitubos Niya ang tanang butang nga gilalang sa Dios ug nahulog sa sala (Heb. 2:9; Col. 1:20), gilalang (gisamkon) Niya ang bag-ong tawo pinaagi sa diosnong elemento Niya (Efe. 2:15), ug gipagula Niya ang Iyang diosnong kinabuhi gikan sa kaha sa Iyang pagka-tawo (Juan 12:24; 19:34; Luc. 12:49-50).
 - d. Sa pagkabanhaw Niya gipanganak Siya aron mahimong panganayng Anak sa Dios (Buh. 13:33; Rom. 1:4; 8:29), nahimo Siyang Espiritung taghatag-og-kinabuhi (1 Cor. 15:45), ug gipanganak Niya pag-usab ang minilyon ka tawo aron mahimong mga anak sa Dios isip mga bahin sa Lawas ni Cristo ug mga inug-umol sa usang bag-ong tawo, sa iglesia (1 Ped. 1:3; Col. 3:10-11).
 - e. Nikayab Siya sa mga langit ug unya nikunsad ingon nga Espiritu aron magpalugwa sa iglesia nga usang bag-ong tawo nga hiniusang magpa-dayag sa Tulo-usang Dios—Joel 2:28-32; Buh. 2:1-4, 16-21.
- B. Busa, ang iglesia nga realidad sa usang bag-ong tawo bahin sab sa diosnong kasaysayan, sa tiunayng kasaysayan sa diosnong misteryo sulod sa dayag, tawhanong kasaysayan; sa pagkatapos ning bahina sa diosnong kasaysayan, mobalik na si Cristo uban sa Iyang mga mananaog nga kasundalohan Niya (Joel 1:4; 3:11) aron mopildi ni Anticristo ug sa kasundalohan niini.
- C. Human niini, modangat na ang usa-ka-libo-ka-tuig nga gingharian; sa kapulihay, mahingpit kining ginghariana sa Bag-ong Jerusalem sa bag-ong langit ug bag-ong yuta; ang Bag-ong Jerusalem unya ang kinataposan, ang kinahingpitang lakang sa kasaysayan sa Dios.

II. Diha ni Pedro (sa pagpangalagad nga nangisda), ni Pablo (sa pagpangalagad nga nagtukod), ug ni Juan (sa pagpangalagad nga nagpuna), makita nato ang tinguha sa kasingkasing sa Ginoo nga mabatonan ang usang bag-ong tawo:

- A. Gigamit sa Dios si Pedro sa adlaw sa Pentecostes sa pagdalag daghang magtutuong Judio (Buh. 2:5-11); labot pa, nakakitag panan-awon si Cornelio sa nag-ampo siya (10:30), ug nakakita sab og panan-awon si Pedro sa nag-ampo siya (vv. 17, 19) nga pinaagi niini natuman ang plano ug lihok sa Dios (vv. 9-14, 27-29) nga mabatonan ang mga Gentil aron praktikal nga maanaa ang usang bag-ong tawo.
- B. Gipadayag ni Pablo sa Efeso 2:14-15 nga gilalang ni Cristo nga usang bag-ong tawo ang mga Judio ug Gentil pinaagi sa Iyang kamatayon nga naglalang-sa-bag-ong-tawo (itandi sa 4:22-24); gisultian ta ni Pablo sa 1 Corinto 12:13 nga gibautismohan tang tanan ngadto sa usa ka Lawas, “mga Judio ba o mga Gresyanhon”; gisultian ta ni Pablo sa Galacia 3:27-28 nga ang mga gibautismohan ngadto ni Cristo nagsul-ob na ni Cristo, ug “dili na mahitabo nga dunay Judio o Gresyanhon”; gisultian ta ni Pablo sa Colosas 3:10-11 nga walay luna diha sa bag-ong tawo ang Judio ug ang Gresyanhon.
- C. Gisultian ta ni Juan nga gipalit sa Ginoo pinaagi sa Iyang dugo ang “mga tawo gikan sa matag banay ug pinulongan ug katawhan ug nasod” (Bug. 5:9); kining mga tinubos ang nag-umol sa iglesia nga usang bag-ong tawo; nakita sab nato pinaagi ni Juan nga ang kaiglesiahan mao ang bulawang mga tangkawan (1:11-12), ug sa kahingpitan, mahimong Bag-ong Jerusalem kining mga tangkawana;

diha sa mga tangkawan ug sa Bag-ong Jerusalem dili ta makakitag mga kalainan sa mga katawhan.

- D. Nagpakita kining tanan nga hukason gyod nato adlaw-adlaw ang daang tawo ug isul-ob ang bag-ong tawo sa pag-inom nato sa usa ka Espiritu (1 Cor. 12:13) aron mabag-o ta diha sa espiritu sa atong salabotan sa tanang bahin sa praktikal nga kinabuhi nato adlaw-adlaw aron matuman ang gitinguha sa kasingkasing sa Ginoo nga mabatonan ang usang bag-ong tawo sa realidad (Efe. 4:22-24).

III. Diha sa diosnong kasaysayan naa ang bag-ong kabuhatan—ang bag-ong tawo nga dunay bag-ong kasingkasing, bag-ong espiritu, bag-ong kinabuhi, bag-ong kinaiya, bag-ong kasaysayan, ug bag-ong kahingpitan—*Mga Alawiton*, #16; Ezeq. 36:26; 2 Cor. 3:16; Mat. 5:8; Tito 3:5:

- A. Ang diosnong kasaysayan, ang kasaysayan sa Dios diha sa tawo, nagsugod sa pagpakatawo ni Cristo ngadto sa Iyang pagkayab aron mahimong Espiritung taghatag-og-kinabuhi ug nipadayon sa pagpuyo Niya sa sulod nato pinaagi sa organicong kaluwasan sa Dios sa pag-anak pag-usab, pagbalaan, pagbag-o, pag-transporma, pagpasama, ug paghimaya aron dad-on ta ngadto sa hingpit nga realidad sa usang bag-ong tawo ug himoon tang mahimayaong pangasaw-onon ni Cristo—Efe. 4:22-24; Rom. 5:10; Bug. 19:7-9.
- B. Mangutana gyod ta karon sa atong kaugalingon ning pangutanaha: Nagkinabuhi ba ta diha sa diosnong kasaysayan, o nagkinabuhi ra ba ta diha sa tawhanong kasaysayan?
1. Gipanganak tang tanan diha sa tawhanong kasaysayan, apan gipanganak na ta pag-usab diha sa diosnong kasaysayan; kon naa sa kalibotan ang pagkinabuhi nato, nagkinabuhi ta diha sa tawhanong kasaysayan; apan kon nagkinabuhi ta diha sa iglesia nga realidad sa usang bag-ong tawo, nagkinabuhi ta diha sa diosnong kasaysayan; diha sa iglesiahang kinabuhi kasaysayan nato ang kasaysayan sa Dios; karon usa ra ang kasaysayan sa duha ka persona—sa Dios ug nato—ang diosnong kasaysayan.
 2. Daygon nato ang Ginoo nga naa ta sa diosnong kasaysayan, nga nagsinati ug nagpahimulos sa misteryoso ug diosnong mga butang aron organico tang maluwas ug mokaylap Siya pinaagi sa pagsangyaw sa ebanghelyo sa kadait sa tibuok yutang gipuy-ag tawo (Efe. 2:14-17; 6:15; itandi sa Mat. 24:14) aron mahimo tang usang bag-ong tawo sa realidad nga mahimong madaogong pangasaw-onon Niya.